

四庫全書

史部

欽定四庫全書

遼史卷七十九

元中書右丞相總裁托克托等修

列傳第九

室昉

耶律賢適

紐哩

郭襲

耶律阿穆爾

室昉字夢奇南京人幼謹厚篤學不出外戶者二十年

雖里人莫識其精如此會同初登進士第為盧龍巡捕
官太宗入汴受冊禮詔昉知制誥總禮儀事天祿中為
南京留守判官應歷間累遷翰林學士出入禁闥十餘
年保寧間兼政事舍人數延問古今治亂得失奏對稱
旨上多昉有理劇才改南京副留守決訟平允人皆便
之遷工部尚書尋改樞密副使參知政事頃之拜樞密
使兼北府宰相加同政事門下平章事乾亨初監修國
史統和元年告老不許進尚書無逸篇以諫太后聞而

嘉獎二年秋詔修諸嶺路昉發民夫二十萬一日畢功
是時昉與韓德讓耶律色珍相友善同心輔政整析蠹
弊知無不言務在息民薄賦以故法度修明朝無異議
八年復請致政詔入朝免拜賜几杖太后遣閤門使李
從訓持詔勞問令常居南京封鄭國公初晉國公主建
佛寺于南京上許賜額昉奏曰詔書悉罪無名寺院今
以主請賜額不惟違前詔恐此風愈熾上從之表進所
撰實錄二十卷手詔褒之加政事令賜帛六百匹九年

薦韓德讓自代不從上以昉年老苦寒賜貂皮衾褥許乘輦入朝病劇遣翰林學士張幹就第授中京留守加尚父卒年七十五上嗟悼輟朝二日贈尚書令遺言戒厚葬恐人譽過情自志其墓

耶律賢適字阿克展裕悅羅卜科之子嗜學有大志滑稽玩世人莫之知惟裕悅烏哲器之嘗謂人曰是人當國天下幸甚應歷中朝臣多以言獲譴賢適樂於靜退游獵自娛與親朋言不及時事討烏爾古還擢右皮室

詳袞景宗在藩邸常與韓匡嗣紐哩等游言或刺譏賢
適勸以宜早疎絕由是穆宗終不見疑賢適之力也景
宗立以功加檢校太保尋遙授寧江軍節度使賜推忠
協力功臣時帝初踐阼多疑諸王或萌非望陰以賢適
為腹心加特進同中書門下平章事保寧二年秋拜北
院樞密使兼侍中賜保節功臣三年為西北路兵馬都
部署賢適忠介膚敏推誠待人雖燕息不忘政務以故
百司首職罔敢媮惰累年滯獄悉決之大丞相高勲契

丹行宮都部署紐哩席寵放恣及帝姨母保母勢薰灼
一時納賂請謁門若賈區賢適患之言于帝不報以病
解職又不允令鑄手印行事乾亨初疾篤得請明年封
西平郡王薨年五十三子觀音大同軍節度使

紐哩字鼎爾琨逸其氏族補積慶宮人應歷初為習馬
實達爾以母憂去一日至雅伯山見一巨人懼走巨人
止之曰勿懼我地祇也葬爾母於斯當速詣闕必貴紐
哩從之累遷馬羣侍中時景宗在藩邸以紐哩出自本

宮待遇殊厚紐哩亦傾心結納及穆宗遇弒紐哩奔赴
景宗是夜集禁兵五百以衛既即位以翼戴功加政事
令契丹行宮都部署賞賚甚渥尋加守太尉北漢主劉
繼元聞紐哩為上信任遇其生日必致禮紐哩素貪同
列蕭安巴達亦好賄二人相善人有氈裘為臬耳子所
著者或戲曰若遇紐哩安巴達必盡取之傳以為笑其
貪猥如此保寧未坐私藏甲五百屬有司方案詰紐哩
袖中又得殺樞密使蕭思溫賊書賜死紐哩善識馬嘗

行郊野見數馬跡指其一日此奇駿也以已馬易之果
然

郭襲不知何郡人性端介識治體久淹外調景宗即位
召見對稱旨知可任以事拜南院樞密使尋加兼政事
令以帝數游獵襲上書諫曰昔唐高祖好獵蘇世長言
不滿十旬未足為樂高祖即日罷史稱其美伏念聖祖
創業艱難修德布政宵旰不懈穆宗逞無厭之欲不恤
國事天下愁怨陛下繼統海內翕然望中興之治十餘

年間征伐未已而寇賊未弭年穀雖登而瘡痍未復正
宜戒懼修省以懷永圖側聞恣意遊獵甚於往日萬一
有銜檠之變搏噬之虞悔將何及況南有強敵伺隙而
動聞之得無生心乎伏望陛下節從禽酣飲之樂為生
靈社稷計則有無疆之休上覽而稱善賜協贊功臣拜
武定軍節度使卒

耶律阿穆爾字布琳約尼北古汗之四世孫也幼總敏
保寧中為南院宣徽使統和初皇太后稱制與耶律色

珍參預國論為都統以征高麗功遷北院宣徽使加政事令四年春宋將曹彬米信等侵燕上親征阿穆爾為都監屢破敵軍十二年行在多盜阿穆爾立禁捕法盜始息先是叛逆之家兄弟不知情者亦連坐阿穆爾諫曰夫兄弟雖曰同胞賦性各異一行逆謀雖不與知輒坐以法是刑及無罪也自今雖同居兄弟不知情者免連坐太后嘉納著為令致仕卒阿穆爾性好聚斂每從征所掠人口聚而建城請為豐州就以家奴閭貴為刺

史時議鄙之子賢格左伊勒希巴

論曰景宗之世人望中興豈其勤心庶績而然蓋承穆宗營虛之餘為善易見亦由羣臣多賢左右弼諧之力也堂昉進無逸之篇郭襲陳諫獵之疏阿穆爾請免同氣之坐所謂仁人之言其利博哉賢適忠介亦近世之名臣紐哩貪猥後人所當取鑑者也

遼史卷七十九

遼史卷七十九考證

耶律賢適傳保寧三年為西北路兵馬都部署 按景

宗紀作西北路招討使

耶律賢適傳大丞相高勲 按高勲傳祇為南面樞密

使未嘗為丞相

紐哩傳為習馬小底 原本訛不底据百官志承應小

底局凡十二職蓋倣宋制今改

遼史卷七十九考證

欽定四庫全書

史部

遼史卷

八十至
八十七

詳校官庶吉士臣何道冲

給事中臣查善長覆勘

總校官編修臣朱 銓

校對官編修臣祁韻士

謄錄監生臣李 愔

欽定四庫全書

遼史卷八十

元中書右丞相總裁托克托等修

列傳第廿

張儉

邢抱朴

馬得臣

蕭朴

耶律色格

張儉宛平人性端慤不事外飾統和十四年舉進士第

一調雲州幕官故事車駕經行長吏當有所獻聖宗獵雲中節度使進曰臣境無他產惟幕僚張儉一代之寶願以為獻先是上夢四人侍側賜食人二口至聞儉名始悟召見容止朴野訪及世務占奏三十餘事由此顧遇特異踐歷清華號稱明幹開泰中累遷同知樞密院事太平五年出為武定軍節度使移鎮大同六年入為南院樞密使帝方眷倚參知政事吳叔達與儉不相能帝怒出叔達為康州刺史拜儉左丞相封韓王帝不豫

受遺詔輔立太子是為興宗賜貞亮弘靖保義守節耆
德功臣拜太師中書令加尚父徙王陳重熙五年帝幸
禮部貢院及親試進士皆儉發之進見不名賜詩褒美
儉衣唯紬帛食不重味月俸有餘賙給親舊方冬奏事
便殿帝見衣袍弊惡密令近侍以火夾穿孔記之屢見
不易帝問其故儉對曰臣服此袍已三十年時尚奢靡
故以此微諷喻之上憐其清貧令恣取內府物儉奉詔
持布三端而出益見獎重儉弟五人上欲俱賜進士第

固辭有司獲盜八人既戮之乃獲正賊家人訴寃儉三
乞申理上勃然曰卿欲朕償命耶儉曰八家老稚無告
少加存恤使得收葬足慰存沒矣乃從之儉在相位二
十餘年裨益為多致政歸第會宗書辭不如禮上將親
征幸儉第尚食先往具饌却之進葵羹乾飯帝食之美
徐問以策儉極陳利害且曰第遣一使問之何必遠勞
車駕上悅而止復即其第賜宴器玩悉與之十二年薨
年九十一勅葬宛平縣

邢抱朴應州人刑部郎中簡之子也抱朴性穎悟好學博古保寧初為政事舍人知制誥累遷翰林學士加禮部侍郎統和四年山西州縣被兵命抱朴鎮撫之民始安加戶部尚書遷翰林學士承旨與室昉同修實錄決南京滯獄還優詔褒美十年拜叅知政事以樞密使韓德讓薦按察諸道守令能否而黜陟之大協人望尋以母憂去官詔起視事表乞終制不從宰相密諭上意乃視事人以孝稱及耶律休格留守南京又多滯獄復詔

抱朴平決之人無冤者改南院樞密使卒贈侍中初抱朴與弟抱質受經于母陳氏皆以儒術顯抱質亦官至侍中時人榮之

馬得臣南京人好學博古善屬文尤長於詩保寧間累遷政事舍人翰林學士常預朝議以正直稱乾亨初宋師屢犯邊命為南京副留守復拜翰林學士承旨聖宗即位皇太后稱制兼侍讀學士上聞唐高祖太宗玄宗三紀得臣乃錄其行事可法者進之及扈從伐宋進言

降不可殺亡不可追二三其德者別議詔從之俄無諫
議大夫知宣徽院事時上擊鞠無度上書諫曰臣竊觀
房玄齡杜如晦隋季書生向不遇太宗安能為一代名
相臣雖不才陛下在東宮幸列侍從今又得侍聖讀未
有裨補聖明陛下嘗問臣以貞觀開元之事臣請畧陳
之臣聞唐太宗侍太上皇宴罷則挽輦至內殿玄宗與
兄弟歡飲盡家人禮陛下嗣祖考之祚躬侍太后可謂
至孝臣更望定省之餘睦六親加愛敬則陛下親親之

道比隆二帝矣臣又聞二帝耽玩經史數引公卿講學至于日昃故當時天下翕然嚮風以隆文治今陛下游心典籍分解章句臣願研究經理深造而篤行之二帝之治不難致矣臣又聞太宗射豕唐儉諫之玄宗臂鷹韓休言之二帝莫不樂從今陛下以毬馬為樂愚臣思之有不宜者三故不避斧鉞言之竊以君臣同戲不免分爭君得臣愧彼負此喜一不宜躍馬揮杖縱橫馳騖不顧上下之分爭先取勝失人臣禮二不宜輕萬乘之

尊圖一時之樂萬一有銜勒之失其如社稷太后何三
不宜儻陛下不以臣言為迂少賜省覽天下之福羣臣
之願也書奏帝嘉歎良久未幾卒贈太子太保詔有司
給葬

蕭朴字延寧國舅少父房之族父魯庫以善屬文為聖
宗詩友朴幼如老成人及長博學多智開泰初補牌印
郎君為南院承旨權知轉運事尋改南面林牙帝問以
政朴具陳百姓疾苦國用豐耗帝悅曰吾得人矣擢左

伊勒希巴時蕭和卓為樞密使朴知部署院以酒廢事
出為興國軍節度使俄召為南面林牙太平三年守太
子太傅明年拜北府宰相遷北院樞密使時太平日久
帝留心翰墨始畫譜牒以別嫡庶由是爭訟紛起朴有
吏才能知人主意敷奏稱旨朝議多取決之封蘭陵郡
王進王恒加政事令及大延琳叛詔安撫東京以便宜
從事興宗即位皇太后稱制國事一委弟孝先方仁德
皇后以馮嘉努所誣被害朴屢言其冤不報每念至此

為之嘔血重熙初改王韓拜東京留守及遷太后于慶州朴徙王楚升南院樞密使四年王魏薨年五十贈齊王子道拉國舅詳袞

耶律巴格字烏庫哩五院部人幼聰慧書一覽輒成誦統和中以世業為本部吏未幾陞扎薩克轄轉樞密院侍御會宗將曹彬米信侵燕巴格以扈從有功擢上京留守開泰四年召為北院樞密副使頃之留守東京七年命東平王蕭巴雅爾帥師伐高麗巴格為都監至開

京大掠而還濟茶陀二河高麗追兵至諸將皆欲使敵渡兩河擊之獨巴格以為不可曰敵若渡兩河必殊死戰乃危道也不若擊於兩河間巴雅爾從之戰敗績明年還東京奏渤海承奉官宜有以統領之上從其言置都知押班後以茶陀之敗削使相降西北路都監卒論曰張儉名符帝夢遂結主知服敝袍不易志敦薄俗功著兩朝世稱賢相非過也邢抱朴甄別守令大愜人望兩決滯獄民無冤濫馬得臣引盛唐之治以諫其君

蕭朴痛皇后之誣至於嘔血四人者皆以明經致位忠
蓋若此宜矣聖宗得人於斯為盛

遼史卷八十

遼史卷八十考證

張儉傳出吳叔達為康州刺史 按聖宗本紀作東州

邢抱朴傳統和十年拜參知政事 按聖宗紀作十二年

蕭朴傳太平四年加政事令 按百官志中書省初名政事省興宗重熙十三年改中書省中書令朴以太平中為令未應有中書令之稱今改

遼史卷八十考證

欽定四庫全書

遼史卷八十一

元中書右丞相總裁托克托等修

列傳第十一

耶律舒嚕

烏魯斯

王繼忠

蕭孝忠

陳扎袞

蕭和卓

耶律舒嚕字伊實揚六院部人魁岸美容儀聖宗同年

生帝愛之甫冠補祇候郎君未幾為宿直官及出師伐
宋為隊帥從南府宰相耶律諾衮統軍使蕭達林畧地
趙魏有功加檢校太師為北院大王攻拔通利軍宋和
議成特進門下平章事賜推誠竭節保義功臣以本部
俸羊多闕部人空乏以羸老之羊及皮毛歲請易南中
絹彼此利之拜北院樞密使封韓王自韓德讓知北院
職多廢曠舒嚕拜命之日朝野相慶從上獵松林至沙
嶺卒年四十四贈守司徒政事令二子實神努烏魯斯

寶神努南院大王

烏魯斯字留隱少有大志未冠補祗候郎君開泰初為本部司徒秩滿閒居徵為郎君班詳袞遷右皮室詳袞將本部兵從東平王巴雅爾伐高麗至茶陀二河戰不利烏魯斯獨全軍還帝嘉賞終西南面招討使

王繼忠不知何郡人仕宋為鄆州刺史殿前都虞候統和二十一年宋遣繼忠屯定之望都以輕騎覘我軍過南府宰相耶律諾袞等獲之太后知其賢授戶部使以

康默記族女女之繼忠亦自激昂事必盡力宋以繼忠
先朝舊臣每遣使必有附賜聖宗許受之二十二年宋
使來聘遺繼忠弧矢鞭策及求和劄子有曰自臨大位
愛養黎元豈欲窮兵惟思息戰每敕邊事嚴諭守臣至
于北界人民不令小有侵擾衆所具悉爾亦備知向以
知雄州何承矩已布此懇自後杳無所聞汝可密言如
許通和即當別使往請詔繼忠與宋使相見仍許講和
以繼忠家無奴隸賜宮戶三十加左武衛上將軍攝中

京留守開泰五年為漢人行宮都部署封琅邪郡王六年進楚王賜國姓上嘗議以蕭和卓為北院樞密使繼忠曰和卓雖有刀筆才暗於大體蕭迪里才行兼備可任上不納竟用和卓及遣和卓伐高麗繼忠為行軍副部署攻興化鎮月餘不下師還上謂明於知人拜樞密使太平三年致仕卒子懷玉仕至防禦使

蕭孝忠字薩巴小字特古斯志慷慨開泰中補祇候郎君尚越國公主拜駙馬都尉累遷殿前都點檢太平中

擢北府宰相重熙七年為東京留守時禁渤海人擊毬
孝忠言東京最為重鎮無從禽之地若非毬馬何以習
武且天子以四海為家何分彼此宜弛其禁從之十二
年入朝封楚王拜北院樞密使國制以契丹漢人分北
南院樞密治之孝忠奏曰一國二樞密風俗所以不同
若併為一天下幸甚事未及行薨追封楚國王帝素服
哭臨赦死囚數人為孝忠薦福葬日親臨賜宮戶守塚
子阿蘇終南院樞密使

陳扎衮小字旺玖雲州人工譯鞬勇而善射統和中補
祇候郎君為奚伊喇詳衮累遷敦睦宮太保兼掌圍場
事開泰五年秋大獵帝射虎以馬馳太速矢不及發虎
怒奮勢將犯蹕左右辟易扎衮捨馬捉虎兩耳騎之虎
駭且逸上命衛士追射扎衮大呼止之虎雖軼山扎衮
終不墮地伺便拔佩刀殺之輦至上前慰勞良久即日
設燕悉以席上金銀器賜之特加節鉞遷圍場都太師
賜國姓命張儉呂德懋賦以美之遷歸義軍節度使同

知上京留守歷西南面招討都監卒

蕭和卓字和掄圖魯卜部人始為本部吏統和初以謹恪補南院侍郎十八年北院樞密使韓德讓舉和卓為中丞以太后遺物使宋還遷北院樞密副使開泰三年為左伊勒希巴和卓久居近職習典故善占對以是尤被寵渥陞北院樞密使時議以為無完行不可大用南院樞密使王繼忠侍宴又譏其短帝頗不悅六年遣和卓伐高麗還時求進者多附之然其服食僕馬不加

于舊帝知其廉以族屬女妻其子詔許親友饋獻豪貴
奔趨于門太平五年有疾帝欲臨視和卓辭曰臣無狀
猥蒙重任今形容毀瘁恐陛下見而動心帝從之會北
府宰相蕭朴問疾和卓執其手曰吾死君必為樞密使
慎勿舉勝己者朴出而鄙之是日卒子烏爾古終本部
節度使

論曰統和諸臣名昭王室者多矣舒嚕拜樞密使朝野
相慶必有得民心者繼忠既不能死國雖通南北之和

有知人之鑑奚足尚哉孝忠扎袞皆有可稱者和卓臨終教蕭朴母舉勝已者樞密其誤國之罪大矣

遼史卷八十一

遼史卷八十一考證

王繼忠傳不知何郡人 按王繼忠係開封人見宋史
王繼忠傳開泰五年為漢人行宮都部署 按原本脫
開泰二字今据本紀增

遼史卷八十一考證

欽定四庫全書

遼史卷八十二

元中書右丞相總裁托克托等修

列傳第十二

耶律隆運

德威

達魯

制心

耶律巴古濟

蕭揚阿克

武白

蕭常格

耶律和克

穆爾古

耶律隆運本姓韓名德讓西南面招討使匡嗣之子也
統和十九年賜名德昌二十二年賜姓耶律二十八年
復賜名隆運重厚有智畧明治體喜建功立事侍景宗
以謹飭聞加東頭承奉官補樞密院通事轉上京皇城
使遙授彰德軍節度使代其父匡嗣為上京留守權知
京事甚有聲尋復代父守南京時人榮之宋兵取河東
侵燕五院亂詳袞希達統軍蕭托果等敗歸宋兵圍城
招脅甚急人懷二心隆運登城日夜守禦援軍至圍解

及戰高梁河宋兵敗走隆運邀擊又破之以功拜遼興
軍節度使徵為南院樞密使景宗疾大漸與耶律色珍
俱受顧命立梁王為帝皇后為皇太后稱制隆運總宿
衛事太后益寵任之統和元年加開府儀同三司兼政
事令四年宋遣曹彬米信將十萬衆來侵隆運從太后
出師敗之加守司空封楚國公師還與北府宰相室昉
共執國政上言西州數被兵加以歲饑宜輕稅賦以來
流民從之六年太后觀擊鞠呼魯蘇突隆運墜馬命立

斬之詔率師伐宋圍沙堆敵乘夜來襲隆運嚴軍以待
敗走之封楚王九年復言燕人挾姦苟免賦役貴族因
為囊橐可遣北院宣徽使趙智戒諭從之十一年丁母
憂詔強起之明年室昉致政以隆運代為北府宰相仍
領樞密使監修國史賜興化功臣十二年六月奏三京
諸鞠獄官吏多因請託曲加寬貸或妄行榜掠乞行禁
止上可其奏又表請任賢去邪太后喜曰進賢輔政真
大臣之職優加賜賚服闋加守太保兼政事令會北院

樞密使耶律色珍薨詔隆運兼之久之拜大丞相進王
齊總二樞府事以南京平州歲不登奏免百姓農器錢
及請平諸郡商賈價並從之二十二年從太后南征及
河許宋成而還徙王晉賜姓出宮籍隸橫帳季父房後
乃改賜今名位親王上賜田宅及陪葬地從伐高麗還
得久疾帝與后臨視醫藥薨年七十一贈尚書令謚文
忠官給葬具建廟乾陵側無子清寧三年以魏王特布
子雅魯為嗣天祚立以皇子額魯溫繼之弟德威姪制

心

德威性剛介善馳射保寧初歷上京皇城使儒州防禦
使改北院宣徽使乾亨初丁父喪彊起復職權西南招
討使統和初党項寇邊一戰却之賜劔許便宜行事領
圖魯卜德哱勒二紂軍以平霜庫赫功真授招討使夏
州李繼遷叛宋內附德威請納之既得繼遷諸夷皆從
璽書褒獎與特哩袞耶律善補敗宋楊繼業加開府儀
同三司政事門下平章事未幾以山西城邑多陷奪兵

柄李繼遷受賂潛懷二心奉詔率兵往諭繼遷託以西
征不出德威至靈州俘掠而還年五十五卒贈兼侍中
子帕克戢彰國軍節度使孫色實達魯色實終特哩袞
達魯字遵寧幼養宮中授小將軍重熙初歷北院宣徽
使右林牙副點檢特哩袞改西北路招討使封漆水郡
王請減軍籍三千二百八十人後以私取回鶻使者獺
毛裘及私取準布貢物決大杖削爵免官俄起為北院
宣徽使十九年改烏爾古德喀勒部都詳袞尋為東北

路詳袞封混同郡王清寧初徙王鄧擢拜南府宰相以年老乞骸骨更王漢太康中薨年八十達魯神情秀徹聖宗子視之興宗待以兄禮雖貴愈謙初為都點檢扈從獵黑嶺獲熊上因樂飲謂達魯曰汝有求乎對曰臣富貴踰分不敢他望惟臣叔先朝優遇身歿之後不肖子坐罪籍沒四時之薦享諸孫中得赦一人以主祭臣願畢矣詔免籍復其產子燕五官至南京步軍都指揮使

制心小字汗努父德崇善醫視人形色輒能決其病累
官至武定軍節度使制心善馴鷹隼統和中為歸化州
刺史開泰中拜上京留守進漢人行宮都部署封漆水
郡王以皇后外弟恩遇日隆樞密副使蕭和卓用事制
心奏和卓寡識度無行檢上默然每內宴歡洽輒避之
皇后不悅曰汝不樂耶制心對曰寵貴鮮能長保是以
憂耳太平中歷中京留守特哩袞南京留守徙王燕遷
南院大王或勸制心奉佛對曰吾不知佛法惟心無私

則近之矣一日沐浴更衣而臥家人聞絲竹之聲怪而入視則已逝矣年五十三贈政事令追封陳王守上京時酒禁方嚴有捕獲私醞者一飲而盡笑而不語卒之日部民若哀父母

耶律巴古濟字保諾延六院額爾奇木博果濟之後勇悍善治生保寧中為天德軍節度歷南京侍衛馬步軍都指揮使以討平党項羌阿里沙密玉勒布密遷南院大王聖宗即位太后稱制會羣臣議軍國事巴古濟上

疏陳便宜數事稱旨即日兼領山西路諸州事統和四年宋將曹彬等侵燕巴古濟擊之甚力賜輸忠保節致主功臣總知山西五州會有告巴古濟曲法虐民者按之有狀以大杖決之八年為南京統軍使卒子雅里官至詳袞

蕭揚阿克字稍隱端毅簡嚴通遼漢字天文相法父卒自五番部親挽喪車至奚王嶺人稱其孝年十九為本班郎君歷鐵林鐵鵠大鷹三軍詳袞乾統元年由烏爾

古德喀勒部屯田太保刺易州幸臣劉彥良以事至州
怙寵恣橫為揚阿克所沮彥良歸妄加毀訾尋遣人代
揚阿克州民詣闕請留即日授武安州觀察使歷烏爾
古納喇順義彰信等軍節度使權知東北路統軍使事
聞耶律朗布都勒幹等叛獨引麾下三十餘人追捕之
身被二創生擒十餘人送之行在坐不獲首惡免官未
幾權南京留守卒

武白不知何郡人為宋國子博士差知相州至通利軍

為我軍所俘詔授上京國子博士改臨潢縣令遷廣德
軍節度副使先是有訟宰相劉慎行與子婦姚氏私者
有司出其罪聖宗詔曰鞠之白正其事使新羅還權中
京留守時慎行諸子皆處權要以白斷百姓分籍事不
直坐左遷未幾遷尚書左丞相樞密事拜遼興軍節度
使致仕卒

蕭常格字和爾沁國舅之族祖揚珠同政事門下平章
事父實埒累官節度使常格魁偉寡言年三十餘始為

祇候郎君歷本族將軍松山州刺史壽隆二年以女為
燕王妃拜永興宮使及妃生子為南院宣徽使尋改漢
人行宮都部署統和初加太子太師為國舅詳袞二年
改遼興軍節度使召為北府宰相以柴冊禮加兼侍中
天慶元年致仕卒謚曰欽肅

耶律和克字海蘭六院額爾奇木迪里孫少穎悟重然
諾保寧初補御琰郎君十年使宋還以宋取河東之意
聞于上燕王韓匡嗣曰何以知之和克曰諸僭號之國

宋皆併收惟河東未下今宋講武習戰意必在漢匡嗣
力沮乃止明年宋果伐漢帝以和克能料事器之乃曰
吾與匡嗣慮不及此授涿州刺史統和初皇太后稱制
召赴京師與韓德讓以事相忤德讓怒取護衛所執戎
仗擊其腦卒子穆爾古

穆爾古字遙隱有智識善射統和初拜南面林牙四年
宋侵燕太后親征穆爾古為前鋒手中流矢拔而復進
太后既至穆爾古以創不能戰與北府宰相蕭繼先巡

遼境上累遷北院大王七年伐宋為先鋒與耶律諾衮破其將李忠吉于定州以疾卒于軍

論曰德讓在統和間位兼將相其克敵制勝進賢輔國功業茂矣至賜姓名王齊晉抑有寵於太后而致然歟宗族如德威平黨項達魯完宗祀制心不苟合家聲益振豈無所自哉若巴古濟之忠揚阿克之孝武白之直亦彬彬乎一代之良臣矣

遼史卷八十二

遼史卷八十二考證

蕭揚阿克傳 按蕭揚阿克父約音努終五番部節度使有傳見後列傳第二十六而揚阿克反居父前史殊疎舛

傳論若巴古濟之忠 按巴古濟原文勃古哲此處止稱勃古二字今併改

遼史卷八十二考證

欽定四庫全書

遼史卷八十三

元中書右丞相總裁托克托等修

列傳第十三

耶律休格

瑪格

耶律色珍

耶律希達

耶律學古

額布勒

耶律休格字遜寧祖實嚕隋國王父烏蘇南院額爾奇
木休格少有公輔器烏爾古室韋叛休格從北府宰相

蕭幹討之應歷末為特哩袞乾亨元年宋侵燕北院大王希達統軍使蕭托果等敗績南京被圍帝命休格代希達將五院軍往救遇大敵於高梁河與耶律色珍分左右翼擊敗之追殺三十餘里斬首萬餘級休格被三創明旦宋主遁去休格以創不能騎輕車追至涿州不及而還是年冬上命韓匡嗣耶律沙伐宋以報圍城之役休格率本部兵從匡嗣等戰于滿城翌日將復戰宋人請降匡嗣信之休格曰彼衆整而銳必不肯屈乃誘

我耳宜嚴兵以待匡嗣不聽休格引兵憑高而視須臾
南兵大至鼓譟疾馳匡嗣倉卒不知所為士卒棄旗鼓
而走遂敗績休格整兵進擊敵乃却詔總南面戍兵為
北院大王車駕親征圍瓦橋關宋兵來救守將張師突
圍出帝親督戰休格斬師餘衆退走入城宋陣于水南
將戰帝以休格馬介獨黃慮為敵所識乃賜玄甲白馬
易之休格率精騎渡水擊敗之追至莫州橫屍滿道數
矢俱罄生獲數將以獻帝悅賜御馬金盃勞之曰爾勇

過于名若人人如卿何憂不克師還拜裕悅聖宗即位
太后稱制令休格總南面軍務以便宜從事休格均戍
兵立更休法勸農桑修武備邊境大治統和四年宋復
來侵其將范密楊繼業出雲州曹彬米信出雄易取岐
溝涿州陷固安置屯時北南院奚部兵未知休格力寡
不敢出戰夜以輕騎出兩軍間殺其單弱以脅餘衆晝
則以精銳張其勢使彼勞於防禦以疲其力又設伏林
莽絕其糧道曹彬等以糧運不繼退保白溝月餘復至

休格以輕兵薄之伺彼蓐食擊其離伍單出者且戰且却由是南軍自救不暇結方陣塹地兩邊而行軍渴乏井澆淖而飲凡四日始達于涿聞太后軍至彬等冒雨而遁太后益以銳卒追及之彼力窮環糧車自衛休格圍之至夜彬信以數騎亡去餘衆悉潰追至易州東聞宋師尚有數萬瀕沙河而饜促兵往擊之宋師望塵奔竄墮岸相蹂死者過半沙河為之不流太后旋旆休格收宋屍為京觀封宋國王又上言可乘宋弱畧地至河

為界書奏不納及太后南征休格為先鋒敗宋兵於望都時宋將劉廷讓以數萬騎並海而出約與李敬源合兵聲言取燕休格聞之先以兵扼其要地會太后軍至接戰殺敬源廷讓走瀛州七年宋遣劉廷讓等乘暑潦來攻易州諸將憚之獨休格率銳卒逆擊于沙河之北殺傷數萬獲輜重不可計獻于朝太后嘉其功詔免拜不名自是宋不敢北向時宋人欲止兒啼乃曰裕悅至矣休格以燕民疲弊省賦役恤孤寡戒戍兵無犯宋境

雖馬牛逸于北者悉還之遠近向化邊鄙以安十六年
薨是夕雨木冰聖宗詔立祠南京休格智畧宏遠料敵
如神每戰勝讓功諸將故士卒樂為之用身更百戰未
嘗殺一無辜二子果巴官至節度使果實終裕悅孫瑪
格

瑪格字額特埒興宗時以散職入見上問卿奉佛乎對
曰臣每旦誦太祖太宗及先臣遺訓未暇奉佛帝悅清
寧中遷唐古部節度使咸雍中累遷匡義軍節度使太

康初致仕卒

耶律色珍字韓隱裕悅赫魯之孫性明敏不事生產保寧元年樞密使蕭思溫薦色珍有經國才上曰朕知次第佚蕩豈可羈屈對曰外雖佚蕩中未可量乃召問以時政占對剴切帝器重之妻以皇后之姪命節制西南面諸軍仍援河東改南院大王乾亨初宗再攻河東從耶律沙至白馬嶺遇敵沙等戰不利色珍赴之令麾下萬矢齊發敵氣褫而退是年秋宗下河東乘勝襲燕北

院大王耶律希達與蕭托果逆戰敗績退屯清河北色
珍取希達等青幟軍于得勝口以誘敵敵果爭赴色珍
出其後奮擊敗之及高粱之戰與耶律休格分左右翼
夾擊大敗宋軍統和初皇太后稱制益見委任為北院
樞密使會宋將曹彬米信出雄易楊繼業出代州太后
親帥師救燕以色珍為山西路兵馬都統繼業陷山西
諸郡各以兵守自屯代州色珍至定安遇賀令圖軍擊
破之追至五臺斬首數萬級明日至蔚州敵不敢出色

珍書帛射城上諭以招慰意陰聞宋軍來救令都監耶律托色夜伏兵險阨俟敵至而發城守者見救至突出色珍擊其背二軍俱潰追至飛狐斬首一萬餘級遂取蔚州賀令圖潘美復以兵來色珍逆于飛狐擊敗之宋軍在渾源應州者皆棄城走色珍聞繼業出兵令蕭達林伏兵于路明日繼業兵至色珍擁衆為戰勢繼業麾幟而前色珍佯退伏兵發色珍進攻繼業敗走至狼牙村衆軍皆潰繼業為流矢所中被擒色珍責曰汝與我

國角勝三十餘年今日何面目相見繼業但稱死罪而已初繼業在宋以驍勇聞人號楊無敵首建梗邊之策至狼牙村心惡之欲避不可得既擒三日死色珍歸闕以功加守太保從太后南伐卒于軍太后親為哀臨仍給葬具庶子果勒官至小將軍

耶律希達孟父楚國王之後便弓馬勇於攻戰景宗時多任以軍事統和四年為右皮室詳袞時宗將楊繼業陷山西郡縣希達從樞密使色珍討之凡戰必以身先

矢無虛發繼業敗于朔州之南匿深林中希達望袍影而射繼業墮馬先是軍令須生擒繼業希達以故不能為功後太后南伐屢有戰績以病卒

耶律學古字伊實揚裕悅幹之庶孫穎悟好學工譯鞮及詩保寧中補御盜郎君乾亨元年宋既下河東乘勝侵燕學古受詔往援始至京宋敗耶律希達蕭托果等勢益張圍城三周穴地而進城中民懷二心學古以計安反側隨宜備禦晝夜不少懈適有敵三百餘人夜登

城學古戰却之會援軍至圍遂解學古開門列陣四面
鳴鼓居民大呼聲震天地旋有高粱之捷以功遙授保
靜軍節度使為南京馬步軍都指揮使二年伐宋乞將
漢軍從之改彰國軍節度使時南境未靜民思休息學
古禁寇掠以安之會宋將潘美率兵分道來侵學古以
軍少虛張旗幟雜丁黃為疑兵是夜適獨虎峪舉烽火
遣人偵視見敵俘掠村野擊之悉獲所掠物擒其將領
自是學古與潘美各守邊約無相侵軼民獲安業以功

為特哩袞卒弟額布勒

額布勒字留隱嚴重有膂力善屬文統和中伐宋屢任以軍事嘗與揚珠不相能因曰爾奴才何所知揚珠訟于北院樞密使韓德讓德讓怒問曰爾安得此奴耶額布勒對曰三父異籍時亦易得德讓笑而釋之後從蕭恒德伐博囉滿達勒以功為東路統軍都監及德讓為大丞相薦其材可任統軍使太后曰額布勒嘗不遜於卿何善而薦德讓奏曰臣忝相位於臣猶不屈況於其

餘以此知可用若任使之必能鎮撫諸番太后從之加金紫崇祿大夫檢校太尉而弟果囉以罪亡額布勒及其母俱下吏恐禍及母陰使人召果囉給曰太后知事之誣汝第來勿畏果囉至送有司坐誅其後退歸田里以疾卒

論曰宋乘下太原之銳以師圍燕繼遣曹彬楊繼業等分道來伐是兩役也遼亦岌岌乎殆哉休格奮擊于高粱敵兵奔潰色珍擒繼業于朔州旋復故地宋自是不

復深入社稷固而邊境寧雖配古名將無愧矣然非學古之在南京安其反側則二將之功蓋亦難致故曰國以人重信哉

遼史卷八十三

遼史卷八十三考證

耶律休格傳休格二子 按聖宗本紀統和二十一年

休格子道士努以謀反誅是休格不止二子也

耶律色珍傳楊繼業被擒太息死罪而已 按契丹國

志稱繼業被擒太息曰主上遇我厚何面目求活於

此不食三日死麾下百餘人皆感泣不肯去遂俱死

無生還者聖宗紀所載畧同則此傳但稱死罪之語

似未足信至業之稱繼業以業在北漢時原賜姓劉

名繼業也

遼史卷八十三考證

欽定四庫全書

遼史卷八十四

元中書右丞相總裁托克托等修

列傳第十四

耶律沙

耶律穆濟

蕭幹

托果

耶律善補

耶律哈里

耶律沙字安隱其先嘗相約尼氏應歷間累官南府宰

相景宗即位總領南面邊事保寧間宋攻河東沙將兵救之有功加守太保乾亨初宋復北侵沙將兵由間道至白馬嶺阻大澗遇敵沙與諸將欲待後軍至而戰冀王迪里監軍耶律穆濟等以為急擊之便沙不能奪迪里等以先鋒渡澗未半為宋人所擊兵潰迪里及其子幹格沙之子德里令公圖敏詳袞唐古等五將俱沒會北院大王耶律色珍兵至萬矢俱發敵軍始退沙將趨太原會漢駙馬都尉盧俊來奔言太原已陷遂勒兵還

宋乘銳侵燕沙與戰于高梁河稍却遇耶律休格及色珍等邀擊敗宋軍宋主宵遁至涿州微服乘驢車間道而走上以功釋前過是年復從韓匡嗣伐宋敗績帝欲誅之以皇后營救得免睿智皇后稱制召賜几杖以優其老復從伐宋敗劉廷讓李敬源之軍賜賚優渥統和六年卒

耶律穆濟字留隱仲父隋國王之後初以皇族入侍景宗即位為林牙以幹給稱保寧間遷樞密副使宋攻河

東南府宰相耶律沙為都統將兵往援穆濟監其軍及
白馬嶺之敗僅以身免宗秉銳攻燕將奚兵翌休格擊
敗之上以功釋前過十一年從都統韓匡嗣伐宋戰于
滿城為宋將所紹諸軍奔潰獨穆濟部伍不亂徐整旗
鼓而歸璽書褒諭改南海軍節度使乾亨二年拜樞密
副使統和初為南京留守宗將曹彬米信等侵邊穆濟
引兵至南京先繕守禦備及車駕臨幸穆濟與耶律休
格逆戰于涿之東克之遷開遠軍節度使故事川民歲

輸稅斗粟折錢五穆濟表請折錢六部民便之統和末卒

蕭幹小字轄哩字博迪北府宰相達魯之子性質直初察克之亂其黨和克齊與幹善使人召之幹曰吾豈能從逆臣縛其人送壽安王賊平上嘉其忠拜羣牧都林牙以伐烏爾古功遷北府宰相改圖魯卜部節度使乾亨初宋伐河東乘勝侵燕詔幹拒之戰于高梁河耶律沙退走幹與耶律休格等併力戰敗之上手勅慰勞自

是每征伐必參決軍事加政事令二年宋兵圍瓦橋夜襲我營韓及耶律允古戰却之時皇后以父呼韓及后為皇太后稱制韓數條奏便宜多見聽用統和四年卒

姪托果

托果字括寧性忠簡應歷初始入待會冀王迪里宣徽使哈斯謀反托果與耶律阿里密告於上上嘉其忠詔尚朴謹公主保寧末為南京統軍使乾亨初宋侵燕托果與北院大王希達拒之不克軍潰托果等不敢復戰

退屯清河帝聞其敗遣使責之曰卿等不嚴偵候用兵
無法遇敵即敗奚以將為托果懼頃之援兵至托果奮
力以敗宋軍上釋其罪降為南京侍衛親軍都指揮使
四年卒

耶律善補字瑤昇孟父楚國王之後純謹有才智景宗
即位授千牛衛大將軍遷大同軍節度使及伐宋韓匡
嗣與耶律沙將兵由東路進善補以南京統軍使由西
路進善補聞匡嗣失利斂兵還乾亨末與宋軍戰于滿

城為伏兵所圍色珍救之獲免以失備決大杖統和初
為特哩袞會宗來侵善補為都元帥逆之不敢戰嶺西
州郡多陷罷特哩袞以其叔安圖有匡輔世宗功上慰
之徵善補為南府宰相遷南院大王會再舉伐宋欲攻
魏府召衆集議將士以魏城無備皆言可攻善補曰攻
固易然城大巨量若克其城士卒貪俘掠勢必不可遏
且傍多巨鎮各出援兵內有重敵何以當之上乃止善
補性懦守靜凡征討憚攻戰急還以故戰多不利年七

十四卒

耶律哈里字留隱令公巴爾達木長子察克之亂其母達魯與焉遣人召哈里哈里拒之亂平達魯以子故獲免哈里儉素不喜聲利以射獵自娛雖居閒人敬之若貴官然保寧初拜彰國軍節度遷特哩袞秩滿稱疾不仕久之復為南院大王及曹彬米信等來侵哈里有却敵功賜資忠保義匡國功臣帝屢親征哈里在南院十餘年鎮以寬靜戶口增給時議重之封漆水郡王遷上

京留守薨詔以家貧給葬具

論曰當高梁朔州之捷偏裨之將如沙與穆濟既因休
格色珍類見其功所謂失之東隅收之桑榆若蕭幹哈
里拒察克之招托果告哈斯之變則不止有戰功而已
其視善補畏懦豈不優哉

遼史卷八十四

遼史卷八十四考證

蕭幹傳時皇后以父呼幹 按本傳載后為皇太后稱
制蓋睿智皇后也考外戚表睿智皇后父思溫係蕭
氏第二世幹係第三世固后兄弟行也而以父呼幹
殊不可解

蕭托果傳尚朴謹公主 按公主表並無朴謹公主外
戚表亦止稱托果為平章政事不稱駙馬都尉疑朴
謹公主非皇女也

遼史卷八十四考證

欽定四庫全書

遼史卷八十五

元中書右丞相總裁托克托等修

列傳第十五

蕭達林

蕭觀音努

耶律托色

耶律轄哩

耶律諾袞

蕭柳

高勲

奚和碩烏

蕭塔喇噶

耶律薩哈

蕭達林字馳寧思溫之再從姪父珠埒哩善相馬應歷
間為馬羣侍中達林幼敦厚有才畧通天文保寧初為
宿直官累任薊劇統和四年宋楊繼業率兵由代州來
侵攻陷城邑達林以諸軍副部署從樞密使耶律色珍
敗之擒繼業于朔州六年秋改南院都監從駕南征攻
沙堆力戰被創太后嘗親臨視明年加右監門衛上將
軍檢校太師遙授彰德軍節度使十一年與東京留守

蕭恒德伐高麗破之高麗稱臣奉貢十二年夏人梗邊
皇太妃受命總烏爾古永興宮分軍討之達林為準布
都詳袞凡軍中號令太妃並委達林師還以功加兼侍
中封蘭陵郡王十五年德呼勒部人殺詳袞而叛遁西
北荒達林將輕騎逐之因討準布之未服者諸番歲貢
方物充于國自後往來若一家馬上賜詩嘉獎仍命林
牙耶律昭作賦以述其功達林以諸部叛服不常上表
乞建三城以絕邊患從之俄召為南京統軍使二十年

復伐宋擒其將王先知破其軍于遂城下祁州上手詔
獎諭進至澶淵宋主軍於城隍間未接戰達林按視地
形取宋之羊觀鹽堆鳬鴈中伏弩卒明日轡車至太后
哭之慟輟朝五日子縉古南京統軍使

蕭觀音努字伊聶奚王達哈之孫統和十二年為右祇
候郎君班詳袞遷奚六部大王先是俸秩外給獐鹿百
數皆取於民觀音努奏罷之及伐宋與蕭達林為先鋒
降祁州下德清軍上加優賞同知南院事卒

耶律托色字勝隱北府宰相烏里之孫善射工畫保寧
間為御蓋郎君九年奉使于漢具言兩國通好長久之
計其主繼元深加禮重統和二年將兵與西邊詳袞耶
律蘇色討圖勒錦大破之四年宋將楊繼業陷山西城
邑托色從北院樞密使耶律色珍擊之敗賀令圖於定
安授西南面招討都監宋兵守蔚州急召外援托色聞
之夜伏兵道傍黎明宋兵果來過未半而擊之城中軍
出色珍復邀之兩軍俱潰奔飛狐地隘不得進殺傷甚

衆賀令圖復集敗卒來襲蔚州托色逆戰破之應州守將自遁進圍寰州冒矢石登城宋軍大潰當色珍擒繼業于朔州托色功居多是年冬復與蕭達林由東路擊宋俘獲甚衆後聞宋兵屯易州率兵逆之至易境而卒初托色破令圖宋將有因傷而仆托色繪其狀以示宋人咸嗟神妙

耶律轄哩字烏庫哩圖吉部人統和五年宋將楊繼業來攻山西轄哩從耶律色珍擊之常居先鋒偵候有功

是歲伐宋宋人拒於滹沱河轄哩率精騎便道先濟獲其將康保威以功詔世預節度使選太平元年稍遷本部節度使六年從蕭惠攻甘州不克會準布攻圍三尅軍轄哩與都監耶律凡嚕古往救至哈屯城西南遇敵不能陣中流矢卒

耶律諾袞字延寧太祖異母弟南府宰相蘇之孫有膂力善調鷹隼統和四年宋楊繼業來侵諾袞為黃皮室紇都監擊敗之盡復所陷城邑軍還加諸衛小將軍及

伐宋有功遷黃皮室詳袞六年再舉將先鋒軍敗宋游
兵于定州為東京統軍使加金紫崇祿大夫從奚王和
碩鵠伐烏舍以戰失利削金紫崇祿階十九年拜南府
宰相二十一年復伐宋擒其將王繼忠于望都俘殺甚
衆以功加同政事門下平章事二十六年為遼興軍節
度使尋復為南府宰相開泰初加尚父卒

蕭柳字圖們淳欽皇后弟阿古齊五世孫幼養于伯父
巴雅爾家多知能文膂力絕人統和中叔父恒德臨終

薦其才詔入侍衛十七年南伐宋將范庭召列方陣而待時皇弟隆慶為先鋒問諸將佐誰敢當者柳曰若得駿馬則願為之先隆慶授以甲騎柳攬轡謂諸將曰陣若動諸君急攻遂馳而前敵少却隆慶席勢攻之南軍遂亂中流矢裹創而戰衆皆披靡巴雅爾留守東京奏柳為四軍兵馬都指揮使明年為北女直詳袞政濟寬猛部民畏愛遷東路統軍使秩滿百姓願留復任許之從伐高麗遇大蛇當路前驅者請避柳曰壯士安懼此

拔劍斷蛇師還致仕柳好滑稽雖君臣燕飲詼諧無所忌時人比之俳優臨終謂人曰吾少有致君志不能直遂故以諧進冀萬有一補俳優名何避頃之被寢衣而坐呼曰吾去矣言訖而逝耶律觀音努集柳所著詩千篇目曰歲寒集

高勲字鼎臣晉北平王信輜之子性通敏仕晉為閤門使會同九年與杜重威來降太宗入汴授四方館使好結權貴能服勤大臣多推譽之天祿間為樞密使總漢

軍事五年劉崇遣使來求封冊詔勲冊崇為大漢神武
皇帝應歷初封趙王出為上京留守尋移南京會宋欲
城益津勲上書請假巡徼以擾之帝然其奏宋遂不果
城十七年宋略地益津闕勲擊敗之知南院樞密事景
宗即位以定策功進王泰保寧中以南京郊內多隙地
請疏畦種稻帝欲從之林牙耶律昆宣言於朝曰高勲
此奏必有異志果令種稻以水為畦設以京叛官軍何
自而入帝疑之不納尋遷南院樞密使以毒藥餽駙馬

都尉蕭卓林事覺流銅州尋又謀害尚書令蕭思溫詔族誅之沒其產皆賜思溫家

奚和碩鶻字籌寧本奚汗之裔保寧中為奚六部長統和初皇太后稱制以耶律休格領南邊事和碩鶻為南面行軍副部署四年宋曹彬米信等來侵和碩鶻與休格破宋兵于燕南手詔褒美軍還怙權撾無罪人李浩至死上以其功釋之冬南征將本部軍由別道進擊敵軍於狼山俘獲甚衆八年上表曰臣竊見太宗之時奚

六部二宰相二詳袞詰命大詳袞班在酋長左右副詳
袞總知酋長五房族屬二宰相匡輔酋長建明善事今
宰相職如故二詳袞別無所掌乞依舊制從之十三年
秋遷都部署伐烏舍駐于鐵驪秣馬數月進至烏舍城
利其俘掠請降不許令急攻之城中大恐皆殊死戰和
碩鄂知不能克從副部署蕭恒德議掠地東南循高麗
北界而還以地遠糧絕士馬死傷詔降封爵卒子烏頁
郎君班詳袞

蕭塔喇噶字雄隱五院部人八世祖珠嚕約尼氏時嘗
為虞人唐安祿山來攻珠嚕戰于黑山之陽敗之以功
為北府宰相世預其選塔喇噶仕開泰間累遷西南面
招討使重熙十一年使西夏諭伐宋事約元昊出別道
以會十二年改右伊勒希巴同知南京留守轉左伊勒
希巴俄授東京留守以世選為北府宰相卒

耶律薩哈字薩蘭伊賔部人南府宰相烏魯斯子天祿
間始仕應歷中拜伊賔大王兼知兵馬事乾亨初宋來

侵詔以本部兵守南京與北院大王希達統軍蕭托果等逆戰希達等敗走獨薩哈全軍還上諭之曰拒敵當如此卿勉之無憂不富貴加守太保統和間卒

論曰遼在統和間數舉兵伐宋諸將如耶律轄哩諾袞蕭柳等俱有降城擒將之功最後以蕭達林為統軍直抵澶淵將與宋戰達林中弩我兵失倚和議始定或者天厭其亂使南北之民休息者耶

遼史卷八十五

欽定四庫全書

遼史卷八十六

元中書右丞相總裁托克托等修

列傳第十六

耶律和卓

劉景

劉六符

耶律紐幹哩

牛溫舒

杜防

蕭華善

特默

耶律哈爾吉

耶律博迪

耶律和卓字諾木袞太祖弟特爾格之孫幼不好弄臨
事明敏善談論以近族入侍每從征有功保寧初加右
龍虎衛上將軍以宋師屢梗南邊拜涿州刺史西南兵
馬都監招安巡檢等使賜推忠奉國功臣和卓久任邊
防雖有克獲功然務鎮靜不妄生事以邀近功鄰壤敬
畏屬部又安宋數遣人結歡冀達和意和卓表聞其事
帝許議和安邊懷敵多有力焉拜左金吾衛上將軍秩

滿遙攝鎮國軍節度使卒和卓智而有文曉暢戎政鎮
范陽時嘗領數騎徑詣雄州北門與郡將立馬陳兩國
利害及周師侵邊本末辭氣慷慨左右壯之自是邊境
數年無事識者以謂和卓一言賢於數十萬兵

劉景字可大河間人四世祖怱即朱滔之甥唐右僕射
盧龍軍節度使父守敬南京副留守景資端厚好學能
文燕王趙延壽辟為幽都府文學應歷初遷右拾遺知
制誥為翰林學士九年周人侵燕留守蕭思溫上急變

帝欲俟秋出師景諫曰河北三關已陷於敵今復侵燕
安可坐視上不聽會父憂去未幾起復舊職一日召草
赦既成留數月不出景奏曰唐制赦書日行五百里今
稽期弗發非也上亦不報景宗即位以景忠實擢禮部
侍郎遷尚書宣政殿學士上方欲倚用乃書其笏曰劉
景可為宰相頃之為南京副留守時留守韓匡嗣因扈
從北上景與其子德讓共理京事俄召為戶部使歷武
定開遠二軍節度使統和六年致仕加兼侍中卒年六

十七贈太子太師子慎行孫一德二玄三嘏四端五常
六符皆具六符傳

劉六符父慎行由膳部員外郎累遷至北府宰相監修
國史時上多即宴飲行誅賞慎行諫曰以喜怒加威福
恐未當帝悟諭政府自今宴飲有刑賞事翌日稟行為
都統伐高麗以失軍期下吏議貴乃免出為彰武軍節
度使賜保節功臣子六人一德二玄三嘏四端五常六
符德早世玄終上京留守常厯三司使武定軍節度使

蝦端符皆第進士蝦端俱尚主為駙馬都尉三蝦獻聖宗一矢斃雙鹿賦上嘉其贍麗與公主不諧奔宋歸殺之四端以衛尉少卿使宋賀生辰方宴大張女樂竟席不顧人憚其嚴還拜樞密直學士六符有志操能文重熙初遷政事舍人擢翰林學士十一年與宣徽使蕭特默使宋索十縣地還為漢人行宮副部署會宋遣使增歲幣以易十縣復與耶律仁先使宋定進貢名宋難之六符曰本朝兵彊將勇海內共知人人願從事於宋若

恣其俘獲以飽所欲與進貢字孰多况大兵駐燕萬一
南進何以禦之顧小節忘大患悔將何及宋乃從之歲
幣稱貢六符還加同中書門下平章事及宋幣至命六
符為三司使以受之六符與參知政事杜防有隙防以
六符嘗受宋賂白其事出為長寧軍節度使俄召為三
司使道宗即位將行大冊禮北院樞密使蕭格曰行大
禮備儀物必擇廣地莫若黃川六符曰不然禮儀國之
大體帝王之樂不奏於野今中京四方之極朝覲各得

其所宜中京行之上從其議尋以疾卒

耶律紐幹哩字海蘭六院額爾奇木博果濟後風神與
秀工畫重熙間累遷同知點檢司事駙馬都尉蕭呼都
克為夏所執奉詔索之三返以歸轉永興宮使右祇候
郎君班詳袞紐幹哩將娶秦晉長公主孫母與公主婢
有隙謂紐幹哩曰能去婢乃許婚紐幹哩計殺之婚成
事覺有司以大辟論紐幹哩善畫寫聖宗真以獻得減
坐長流邊戍復以寫真拜同知南院宣徽事使宋賀正

寫宋主容以歸清寧間復使宋宋主賜宴瓶花隔面未
得其真陞辭僅一視及境以像示餞者駭其神妙聞重
元亂不即勤王賊平入賀帝責之宴酣顧紐幹哩曰重
元事成卿必為上客紐幹哩大慙咸雍中加太子太師
卒

牛溫舒范陽人剛正尚節義有遠器咸雍中擢進士第
滯小官大安初累遷戶部使轉給事中知三司使事國
民兼足上以為能加戶部侍郎改三司使壽隆中拜參

知政事兼同知樞密院事攝中京留守部民詣闕請真
拜從之召為三司使乾統初復參知政事知南院樞密
使事五年夏為宋所攻來請和解溫舒與蕭塔喇台使
宋方大燕優人為道士裝索土泥藥爐優曰土少不能
和溫舒遽起以手籍土懷之宋主問其故溫舒對曰臣
奉天子威命來和若不從則當卷土收去宋人大驚遂
許夏和還加中書令卒

杜防涿州歸義縣人開泰五年擢進士甲科累遷起居

郎知制誥人以為有宰相器太平中遷政事舍人拜樞密副使重熙九年夏人侵宋宋遣郭禎來告請與夏和上命防使夏解之如約罷兵各歸侵地拜參知政事韓紹芳劉六符忌之防待以誠十二年紹芳等罷愈見信任十三年拜南府宰相防生子帝幸其第賜名王門努以進奏有誤出為武定軍節度使十四年復召為南府宰相二十一年秋祭仁德皇后詔儒臣賦詩防為冠賜金帶道宗諒陰為大行皇帝山陵使清寧二年上諭防

曰朕以卿年老嗜酒不欲煩以劇務朝廷之事總綱而已頃之拜右丞相加尚父卒上歎悼不已賙贈加等官給葬具贈中書令諡曰元肅子公謂終南府宰相

蕭華善字洪寧國舅太父房之後忠直多志畧開泰初補御蓋郎君尋為內史太醫等局都林牙使宋賀正將宴典儀者告班節度使下華善曰班次如此是不以大國之使相禮且以錦服為貺如待蕃部若果如是吾不預宴宋臣不能對易以紫服位視執政使禮始定八年

秋為唐古特部節度使卒弟特默

特默字和寧為人機辨任氣太平中累遷安東軍節度使有能稱十一年召為左祇候郎君班詳袞遷左伊勒希巴重熙十年累遷北院宣徽使與劉六符使宋索十縣故地宋請增銀絹十萬兩疋以易之歸稱旨加同政事門下平章事詔城西南渾底甸還復為北院宣徽使卒

耶律哈爾吉字特們六院額爾奇木博果濟後重熙中

累遷西南面招討都監充宋國生辰使館於白溝驛宋宴勞優者嘲蕭惠河西之敗哈爾吉曰勝負兵家常事我嗣聖皇帝俘石重貴至今興中有石家寨惠之一敗何足較哉宋人慚服帝聞之曰優伶失辭何可傷兩國交好鞭二百免官清寧初起為懷化軍節度使七年入為北院大王封幽國公歷遼興軍節度使東北路詳衮加兼侍中致仕卒哈爾吉明達勤恪懷柔有道置諸賓館及西邊營田皆自哈爾吉發之

耶律博迪字薩巴季父房諾袞之孫孤介寡合重熙初補牌印郎君清寧初稍遷知易州去官部民請留許之咸雍八年改彰國軍節度使上獵達里庫山博迪謁於行宮帝問邊事對曰自應州南境至天池皆我耕牧之地清寧間邊將不謹為宋所侵烽堠內移似非所宜道宗然之拜北面林牙後遣人使宋得其侵地命博迪往定疆界還拜南院宣徽使太康四年遷忠順軍節度使尋為南院大王改同知南京留守事召拜南府宰相賜

貞良功臣封吳國公為北院樞密使廉謹奉公知無不為大安中致仕卒子錫默北院樞密副使

論曰耶律和卓安邊講好養兵息民其慮深遠矣六符啟釁邀功豈國家之利哉牛杜博迪哈爾吉輩銜命出使幸不辱命紐幹哩殺婢以求婚身負罪釁畫其主容以冀免死亦可醜也

遼史卷八十六

欽定四庫全書

遼史卷八十七

元中書右丞相總裁托克托等修

列傳第十七

蕭孝穆

薩巴
孝友

孝先

蕭博諾

耶律布庫

夏行美

蕭孝穆小字和爾沁淳欽皇后弟阿古齊五世孫父托
輝為國舅詳袞孝穆廉謹有禮法統和二十八年累遷

西北路招討都監開泰元年遙授建雄軍節度使加檢校太保是年珠拉等變孝穆擊走之冬進軍哈屯城準布部結五羣牧長扎拉圖等謀中外相應孝穆悉誅之迺嚴備禦以待餘黨遂潰以功遷九水諸部安撫使尋拜北府宰相賜忠穆熙霸功臣檢校太師同政事門下平章事八年還京師太平二年知樞密院事充漢人行宮都部署三年封燕王南京留守兵馬都總管九年大延琳以東京叛孝穆為都統計之戰于蒲水中軍稍却

副部署蕭必塔都監蕭博諾以兩翼夾擊賊潰追敗之
于手山北延琳走入城深溝自衛孝穆圍之築重城起
樓櫓使內外不相通城中撤屋以燬其將楊詳世等擒
延琳以降遼東悉平改東京留守賜佐國功臣為政務
寬簡撫納流徙其民安之興宗即位徙王秦尋復為南
京留守重熙六年進封吳國王拜北院樞密使八年表
請籍天下戶口以均徭役又陳諸部及錫里軍利害從
之由是政賦稍平衆悅九年徙王楚時天下無事戶口

蕃息上富於春秋每言及周取十縣慨然有南伐之志
群臣多順旨孝穆諫曰昔太祖南伐終以無功嗣聖皇
帝仆唐立晉後以重貴叛長驅入汴鑾馭始旋反來侵
軼自後連兵二十餘年僅得和好蒸民樂業南北相通
今國家比之曩日雖曰富彊然勲臣宿將往往物故且
宋人無罪陛下不宜棄先帝盟約時上意已決書奏不
報以年老乞骸骨不許十一年復為北院樞密使更王
齊薨追贈大丞相晉國王諡曰貞孝穆雖椒房親位高

益畏太后有賜輒辭不受妻子無驕色與人交始終如一所薦拔皆忠直士嘗語人曰樞密選賢而用何事不濟若自親煩碎則大事凝滯矣自蕭和卓以吏才進其後轉効不知大體歎曰不能移風易俗偷安爵位臣子之道若是乎時稱為國寶臣目所著文曰寶老集二子阿拉薩巴弟孝先孝忠孝友各有傳

薩巴字周隱七歲以戚屬加左右千牛衛大將軍重熙初補祇候郎君性廉介風姿爽朗善毬馬馳射帝每燕

飲喜諧謔薩巴雖承寵顧常以禮自持時人稱之以柴
冊禮恩加檢校太傅永興宮使總領左右護衛同知點
檢司事尚魏國公主拜駙馬都尉為北院宣徽使仍總
知朝廷禮儀重熙末出為西北路招討使武寧郡王居
官以治稱清寧初薨年三十九追封齊王

孝先字延寧小字哈里統和十八年補祇候郎君尚南
陽公主拜駙馬都尉開泰五年為國舅詳袞將兵城東
鄙還為南京統軍使太平三年為漢人行宮都部署尋

加太子太傅五年遷上京留守以母老求侍復為國舅
詳袞改東京留守會大延琳反被圍數月穴地而出延
琳平留守上京十一年帝不豫欽哀召孝先總禁衛事
興宗諒陰欽哀弒仁德皇后孝先與蕭楚布蕭必塔等
謀居多及欽哀攝政遙授天平軍節度使加守司徒兼
政事令重熙初封楚王為北院樞密使孝先以椒房親
為太后所重在樞府好惡自恣權傾人主朝多側目二
年太后與孝先謀廢立事帝知之勒衛兵出宮召孝先

至諭以廢太后意孝先震懾不能對遷太后于慶州孝
先恒鬱鬱不樂四年徙王晉後為南京留守卒諡忠肅
孝友字塔布延小字辰瑠開泰初以戚屬為小將軍
太平初以大冊加左武衛大將軍檢校太保賜名孝友
重熙元年累遷西北路招討使封蘭陵郡王八年進王
陳先是蕭惠為招討使專以威制西羌諸夷多叛孝友
下車厚加綏撫每入貢輒增其賜物羌人以安久之寢
成姑息諸夷桀驁之風遂熾議者譏其過中十年加政

事令賜劾節宣庸定遠功臣更王吳後以葬兄孝穆孝
忠還京師拜南院樞密使加賜翊聖協穆保義功臣進
王趙拜中書令丁母憂起復北府宰相出知東京留守
會伐夏孝友與樞密使蕭惠失利河南帝欲誅之太后
救免復為東京留守徙王燕改上京留守更王秦清寧
初加尚父頃之復留守東京明年復為北府宰相帝親
製誥詞以褒寵之以柴冊恩遙授洛京留守益賜純德
功臣致仕進封豐國王坐子呼圖克首與重元亂伏誅

年七十三呼圖克在逆臣傳

蕭博諾字留隱奚王楚布寧之後幼孤貧傭于醫家牧牛傷人稼數遭笞辱醫者嘗見博諾熟寐有蛇遶身異之教以讀書聰敏嗜學不數年涉獵經史習騎射既冠意氣豪邁開泰間選充護衛稍進用俄坐罪黜流烏爾古久之召還累任劇遷奚六部大王治有聲太平九年大延琳據東京叛博諾為都監將右翼軍遇賊戰蒲水中軍少却博諾與左翼軍夾攻之先據高麗女直要衝

使不得求援又敗賊于手山延琳走入城博諾不介馬而馳追殺餘賊已而大軍圍東京博諾討諸叛邑平吼山賊延琳堅守不敢出既被擒博諾以功加兼侍中重熙六年改北準布副部署再授奚六部大王十八年為西南面招討使西征夏國博諾以兵二千據河橋聚巨艦數十艘仍作大鉤人莫測戰之日布舟于河綿亘三十餘里遣人伺上流有浮物輒取之大軍既失利博諾未知適有大木順流而下勢將壞浮梁斷歸路操舟者

爭鉤致之橋得不壞明年復西征懸兵深入大掠而還
復奚六部大王致仕卒

耶律布庫字提隱太祖弟蘇之四世孫以武勇稱統和
初為涿州刺史從伐高麗有功開泰末為上京內客省
副使太平二年城鴨綠江布庫守之在鎮有治績五年
改廣德軍節度使尋遷東京統軍使蒞政嚴肅諸部懾
服九年大延琳叛以書結保州夏行美執其人送布庫
布庫入據保州延琳氣沮以功拜特哩袞十一年為子

鐵驪所弑

夏行美渤海人太平九年大延琳叛時行美總渤海軍于保州延琳使人說欲與俱叛行美執送統軍耶律布庫又誘賊黨百人殺之延琳謀沮迺嬰城自守數月而破以功加同政事門下平章事錫賚甚厚明年擢忠順軍節度使重熙十七年遷副部署從點檢耶律義先討富珠哩獲其酋托多羅以歸致仕卒上思其功遣使祭于家

論曰不有君子其能國乎方其擒延琳定遼東一時諸將之功偉矣宜其撫劔抵掌賈餘勇以威天下也蕭孝穆之諫南侵其意防何其弘遠歟是豈瞋句語難者所能知哉至論移風俗為治之本親煩碎為失大臣體又向其深切著明也為國寶臣宜矣孝先預弑仁德之謀猶依城社以逃熏灌為國巨蠹雖功何議焉

遼史卷八十七

遼史卷八十七考證

蕭孝穆傳孝穆二子阿拉薩巴 按聖宗本紀太平四年以孝穆子蕭順為千牛衛將軍百官志同考孝穆子無有名順者此處薩巴傳有加千牛衛大將軍正與紀合疑蕭順即薩巴之賜名紀載互異也

蕭博諾傳十八年為西南招討使西征夏國 按興宗本紀及西夏外紀俱係重熙十八年伐夏刻本舊作十五年係誤謹據改

遼史卷八十七考證